



Broj: 01-05-26035/16
Sarajevo; 01.11.2016.godine

SKUPŠTINA KANTONA SARAJEVO
-Služba za skupštinske poslove-

PREDMET: Odgovor na poslaničko pitanje

Zastupnica Neira Dizdarević je na 19. Radnoj sjednici Skupštine Kantona Sarajevo, održanoj dana 07.09.2016.godine, u okviru tačke Dnevnog reda "Zastupnička pitanja, inicijative i odgovori", u skladu sa Poslovnikom Skupštine Kantona Sarajevo, postavila zastupničko pitanje koje je povezano sa pitanjima postavljenim na prethodnim sjednicama a tiče se problema stomatoloških usluga za osobe sa težim invaliditetom, te isto dostavila u pisanoj slijedećoj formi.

"Na 19.Radnoj sjednici Skupštine Kantona Sarajevo, zakazanoj za 07.09.2016.godine, osvrnuću se na odgovor koji sam dobila od Ministarstva zdravstva Kantona Sarajevo na moje zastupničko pitanje na kojem insistiram već par mjeseci, a tiče se problema stomatoloških usluga za osobe sa težim invaliditetom, prvenstveno za djecu sa posebnim potrebama. S obzirom da na ovom problemu insistiram još od mjeseca marta, bez ikakvih konkretnih poduzetih aktivnosti od strane nadležnih institucija, a da je istu inicijativu na prethodnoj sjednici pokrenuo kolega iz vladajuće koalicije, nadam se da će se konačno pristupiti iznalaženju rješenja. Naposlijetku, nije važno čija se inicijativa izvrši, važno je da konačno ova populacija dobije adekvatnu uslugu.

Naime, u svakom odgovoru koji sam dobila od resornog ministarstva se navodi da je osnovni problem nedostatak stručnog kadra – specijaliste za anesteziju i reanimaciju. Stomatološki fakultet u svojim obraćanjima resornom ministarstvu navodi da raspolaže potrebnim prostorom i opremom, i da je jedino neophodna suglasnost Ministarstva za popunjavanje već sistematizovanih radnih mesta.

Međutim, Ministarstvo zdravstva vidi rješenje problema u raspisivanju javnog poziva svim zdravstvenim ustanovama koje obavljaju navedenu djelatnost i koje su spremne pružati usluge osobama sa težim invaliditetom. Ovim putem molim za obrazloženje – da li je racionalnije, brže i efikasnije dati suglasnost za upošljavanje anesteziologa na Stomatološkoj klinici, koja raspolaže potrebnom opremom, ili raspisivati tendere za privatne klinike koje će se baviti ovom problematikom?"

ODGOVOR

Ministarstvo zdravstva Kantona Sarajevo je u prethodnom periodu preduzelo niz aktivnosti na rješavanju problema pacijenata sa posebnim potrebama, koji je prisutan dugo godina i odnosi se na ostvarivanje prava na stomatološke usluge u općoj anesteziji pacijenata sa različitim stepenom invaliditeta. U predhodnim odgovorima na poslanička pitanja u vezi sa ovom temom naglasili smo da Zavod zdravstvenog osiguranja Kantona Sarajevo finansira pružanje stomatološke zaštite na klinikama Stomatološkog fakulteta Univerziteta u Sarajevu sredstvima iz obaveznog zdravstvenog osiguranja u iznosu kojim je moguće obezbjediti kontinuitet u radu sa navedenom populacijom.

U sklopu provedenih aktivnosti od početka ovog mandata, ovo ministarstvo u suradnji sa predstavnicima Stomatološkog fakulteta sa klinikama Univerziteta u Sarajevu, uspjelo je otkloniti sve okolnosti koje su dovele do ovog problema.

Ambulanta za pacijente sa posebnim potrebama stavljena je u funkciju, sa početkom rada od 01.11.2016.godine. U navedenoj ambulanti bit će tretirani svi pacijenti indicirani za stomatološki tretman u općoj anesteziji, a pružanja stomatoloških usluga djeci sa posebnim potrebama omogućena je besplatna stomatološka zaštita u općoj i lokalnoj anesteziji.

Izražavamo zadovoljstvo što je ovo pitanje trajno riješeno. Također zahvaljujemo svima koji su na bilo koji način doprinjeli da roditelji djece sa posebnim potrebama imaju bar jedan problem manje.

S poštovanjem,



web: <http://mz.ks.gov.ba>
e-mail: minzdrav@ks.gov.ba
Tel: + 387 (0) 33 562-104, Fax: + 387 (0) 33 562-243
Sarajevo, Reisa Džemaludina Čauševića 1

